

Na osnovu čl. 22. i 24. stav 2. Zakona o Vladi Kantona Sarajevo ("Službene novine Kantona Sarajevo", broj 24/03 – Prečišćeni tekst), člana 83. stav 1. Zakona o lijekovima ("Službene novine Federacije BiH", br. 51/01 i 29/05) Vlada Kantona Sarajevo, na 67. sjednici održanoj 26.04.2012. godine, donijela je

## **ODLUKU**

### **O LISTI LIJEKOVA KANTONA SARAJEVO**

#### **I OPĆE ODREDBE**

##### **I**

##### **(Predmet Odluke)**

Ovom Odlukom utvrđuje se obim prava osiguranih lica u primarnom nivou zdravstvene zaštite na korištenje lijekova koji se obezbjeđuju na teret sredstava Zavoda zdravstvenog osiguranja Kantona Sarajevo (u daljem tekstu: Zavod), način i postupak propisivanja i izdavanja tih lijekova i primjene u zdravstvenim ustanovama primarnog nivoa zdravstvene zaštite, kao i način utvrđivanja Liste lijekova Kantona Sarajevo (u daljem tekstu: Lista lijekova).

#### **II LISTA LIJEKOVA**

##### **II**

##### **(Dostupnost lijekova koje finansira Zavod)**

Osigurana lica, na teret sredstava obaveznog zdravstvenog osiguranja ostvaruju pravo na lijekove koji:

- a) su sastavni dio Liste esencijalnih lijekova neophodnih za osiguranje zdravstvene zaštite u okviru standarda obaveznog zdravstvenog osiguranja u Federaciji Bosne i Hercegovine (u daljem tekstu: esencijalna Lista), ("Službene novine Federacije BiH", br: 75/11),
- b) nisu obuhvaćeni esencijalnom listom a evidentirani kao potrebni za liječenje osiguranika
- c) su u primjeni u zdravstvenim ustanovama primarne zdravstvene zaštite, a prema režimu propisivanja i izdavanja, kako je određeno odobrenjem za stavljanjem lijekova u promet od strane Agencije za lijekove i medicinska sredstva BiH (u daljem tekstu: Agencija)-(ZU) i (SZU)

##### **III**

##### **(Podjela Liste lijekova)**

Listu lijekova koja je sastavni dio ove Odluke čine tri liste, i to:

- a) A Lista lijekova - lijekovi obuhvaćeni Listom A sa esencijalne liste lijekova sa učešćem Zavoda u cijeni lijeka od 100%

- b) B Lista lijekova - lijekovi koji su obuhvaćeni Listom B esencijalnih lijekova, te lijekovi evidentirani kao potrebni za liječenje osiguranika Kantona Sarajevo, a obezbjeđuju se stanovništvu Kantona Sarajevo sa učešćem Zavoda u cijeni lijeka u iznosu od 25%, 50%, 75% i 100%.
- c) C Lista lijekova - ampularni lijekovi koji se primjenjuju u zdravstvenim ustanovama primarne zdravstvene zaštite na teret sredstava obaveznog zdravstvenog osiguranja.

#### IV

##### (Grupe lijekova)

Lijekovi koji se nalaze na Listi lijekova razvrstavaju se u sljedeće grupe:

I grupa: Lijekovi koje samostalno propisuju ovlašteni doktori medicine, doktori stomatologije i doktori medicine specijalisti u primarnoj zdravstvenoj zaštiti (oznaka Rp);

II grupa: Lijekovi koje propisuju ovlašteni doktori medicine i doktori stomatologije isključivo po preporuci specijaliste određene grane medicine, koji se bave liječenjem stanja i bolesti za koje propisuje lijek (oznaka Rp/spec);

Doktori medicine u specijalističko-konsultativnoj službi na posebnom specijalističkom nalazu predlažu potrebnu terapiju – lijekove iz grupe II, doktoru medicine u primarnoj zdravstvenoj zaštiti, s tim da ovlašteni doktor u primarnoj zdravstvenoj zaštiti na poleđini recepta upisuje ime i prezime doktora specijaliste koji je predložio taj lijek i klauzulu "po preporuci specijaliste".

III grupa: Lijekovi koji se upotrebljavaju isključivo kao nastavak bolničkog liječenja, pod kontrolom zdravstvenog radnika.

Lijekovi iz grupe III propisuju se ukoliko je neophodno nastaviti liječenje tim lijekom nakon otpusta osiguranog lica sa stacionarnog liječenja.

Na poleđini recepta, ovlašteni doktor u primarnoj zdravstvenoj zaštiti, upisuje ime i prezime doktora specijaliste određene grane medicine iz stacionarne ustanove koji je predložio lijek, kao i klauzulu "nastavak bolničkog liječenja".

IV grupa: lijekovi koji se primjenjuju u zdravstvenim ustanovama primarne zdravstvene zaštite na teret sredstava obaveznog zdravstvenog osiguranja (u daljem tekstu: ampularni lijekovi) u okviru Zavoda zdravstvenog osiguranja Kantona Sarajevo, a koji se propisuju osiguranicima na posebnom receptu za ampularni lijek.

#### V

##### (Cijene lijekova)

- (1) Cijene lijekova koje se nalaze na Listi lijekova su utvrđene esencijalnom listom, osim u slučajevima u kojima je Zavod, pregovaračkim postupkom postigne nižu cijenu.
- (2) Nakon objave referalnih cijena lijekova od strane Agencije, u smislu člana 22. stav 2. Pravilnika o načinu kontrole cijena, načinu oblikovanja cijena lijekova i načinu izvještavanja o cijenama lijekova u BiH (u daljem tekstu: maksimalne državne cijene lijekova), te usklađivanja cijena lijekova sa esencijalne liste lijekova Federacije BiH sa maksimalnim državnim cijenama lijekova, a u smislu tačke XI Odluke o esencijalnoj listi lijekova, pristupit će se usklađivanju cijena lijekova na listi lijekova Kantona Sarajevo, na način i u rokovima kako je to predviđeno Odlukom o esencijalnoj listi lijekova.
- (3) Usklađivanje cijena lijekova iz stava 2. ove tačke obavlja Zavod zdravstvenog osiguranja Kantona Sarajevo, uz prethodnu saglasnost ministra zdravstva Kantona Sarajevo.

## VI

### (Obavezni podaci u Listi lijekova)

Obavezni podaci na A i B Listi lijekova su:

- a) redni broj,
- b) šifra lijeka,
- c) ATC klasifikacija,
- d) nezaštićeno (generičko) ime lijeka - INN,
- e) zaštićeno ime lijeka,
- f) naziv proizvođača lijeka,
- g) farmaceutski oblik i jačina lijeka
- h) definisana dnevna doza (DDD),
- i) jedinica mjere,
- j) procentualno učešće Zavoda u cijeni lijeka u iznosu od 25%, 50%, 75% i 100%,
- k) cijena lijeka koju snosi Zavod,
- l) režim propisivanja i indikacije za koji se određeni lijek može propisivati.

Obavezni podaci na C Lista lijekova su:

- a) redni broj,
- b) ATC klasifikacija,
- c) nezaštićeno (generičko) ime lijeka - INN,
- d) farmaceutski oblik i jačina lijeka

## VII

### (Lijekovi koje u cjelosti snosi osigurano lice)

- (1) Lijekovi koji se ne nalaze na listi lijekova ljekar može propisati isključivo na obrascu bijelog recepta, a troškove nabavke lijeka snosi osigurano lice u cjelosti.
- (2) Ukoliko se lijek sa liste lijekova propisuje osiguranom licu koje je pretrpjelo povredu na radu ili boluje od profesionalnog oboljenja, izuzetno od stava (1) ove tačke, ovlašteni ljekar propisuje lijek na bijelom receptu, u skladu sa odredbama člana 81. Zakona o zdravstvenom osiguranju, kojim je utvrđena obaveza poslodavcu da snosi sve troškove zdravstvene zaštite nastale kao posljedica povrede na radu ili profesionalnog oboljenja.

## III POSTUPAK DONOŠENJA LISTE LIJEKOVA

## VIII

### (Način donošenja Odluke o listi lijekova)

Odluku o listi lijekova donosi Vlada Kantona Sarajevo na prijedlog ministra zdravstva Kantona Sarajevo (u daljnjem tekstu:Ministar)

## IX

### (Komisija za lijekove)

- (1) Na prijedlog ministra, u Zavodu se obrazuje Komisija za lijekove (u daljnjem tekstu: Komisija) od istaknutih stručnjaka iz oblasti farmacije, medicine i stomatologije.
- (2) Komisija preispituje i inovira Listu lijekova jednom godišnje (redovna revizija) predlaže izmjene i dopune Liste lijekova uz obavezu usaglašavanja sa izmjenama i

dopunama Liste esencijalnih lijekova FBiH, odnosno liste registrovanih lijekova u BiH i analize podnesenih zahtjeva za uvrštavanje lijekova na Listu lijekova.

- (3) Izmjene i dopune ove Odluke, odnosno Liste lijekova, vrše se na način i po postupku kako su doneseni.

## X

### (Zahtjev za uvrštavanje lijekova na Listu lijekova)

- (1) Prilikom podnošenja zahtjeva za uvrštavanje lijekova na Listu lijekova podnosilac je uz zahtjev dužan dostaviti sljedeću dokumentaciju:
- rješenje Agencije za lijekove i medicinska sredstva BiH o stavljanju lijeka u promet na području BiH,
  - nalaz o kontroli kvaliteta prve proizvedene serije nakon registracije izdate od Kontrolnog laboratorija Agencije sukladno Pravilniku o načinu kontrole kvaliteta lijeka („Službeni glasnik BiH, broj 97/09“)
  - osigurana kontinuirana kontrola svake serije uvezenog odnosno proizvedenog lijeka u Kontrolnom laboratoriju Agencije za lijekove i medicinska sredstva BiH, sukladno Pravilniku o načinu kontrole kvaliteta lijeka, što se dokazuje nalazom Kontrolnog laboratorija Agencije, zadnje uvezene odnosno proizvedene serije,
  - izjava proizvođača da se obavezuje da će obezbjediti prisustvo lijeka na tržištu u dovoljnim količinama, najmanje 12 mjeseci od dana stavljanja lijeka na listu lijekova,
  - izjava proizvođača da se obavezuje da će ukoliko povlači lijek iz prometa obavjestiti Zavod o tome šest mjeseci ranije
  - predloženu veleprodajnu cijenu lijeka, cijenu DDD (definisana dnevna doza) u KM
  - lijekovi čija je ponuđena veleprodajna cijena nerealno manja u odnosu na inodomicilnu cijenu zemlje (dumping cijena) u kojoj se lijek proizvodi se neće uzeti u razmatranje
  - farmakoekonomsku studiju koja najbolje ilustruje efekat primjene lijeka uključujući farmakoekonomski proračun u odnosu na DDD i dužinu trajanja liječenja
  - ostala dokumenta za koja podnosilac zahtjeva smatra da mogu da pomognu Komisiji za lijekove u odlučivanju
- (2) Na pozitivnu listu lijekova Kantona Sarajevo može se uvrstiti maksimalno 5 (pet) zaštićenih naziva lijeka u okviru istog generičkog naziva, oblika, jačine i pakovanja, uključujući u ovo obavezno originatora i lijekove domaće farmaceutske industrije, ukoliko je registrovana generička paralela domaće farmaceutske industrije, a saglasno preuzetoj obavezi iz Politike lijekova u Federaciji Bosne i Hercegovine («Službene novine Federacije BiH», br.19/08) i Politici lijekova i medicinskih sredstava Bosne i Hercegovine („Službeni Glasnik BiH“, br. 55/11).
- (3) Izuzetno, na listu lijekova Kantona Sarajevo mogu se privremeno uvrstiti i lijekovi oni proizvođača lijekova koji nemaju nalaz o kontroli kvaliteta prve proizvedene serije lijeka nakon registracije urađen u Kontrolnom laboratoriju Agencije, uz uvjet da se radi o lijekovima od vitalne važnosti za koje ne postoji adekvatna zamjena, te uz dokaz da ispunjavaju ostale kriterije kao i uz dokaz da su navedeni proizvođači predali svoje uzorke lijekova kontrolnom laboratoriju Agencije a radi obavljanja kontrole kvaliteta saglasno Državnom zakonu i Pravilniku.
- (4) Pod gore navedenim uslovima lijek se može privremeno uvrstiti na listu lijekova, najduže do 60 dana, u kom roku je proizvođač lijekova dužan dostaviti tražene nalaze o

kontroli kvaliteta lijeka od strane Kontrolnog Laboratorija Agencije za lijekove i medicinska sredstva Bosne i Hercegovine.

## XI

### ( Skidanje lijekova sa Liste lijekova)

Kroz funkciju praćenja primjene Liste lijekova, Komisija za lijekove predlaže Ministru zdravstva skidanje lijekova sa Liste u sljedećim slučajevima:

- a) ukoliko je dozvola za stavljanje lijeka u promet prestala da važi
- b) ukoliko proizvođač ne snabdijeva tržište lijekom u dovoljnim količinama
- c) iz farmakoekonomskih razloga
- d) iz farmakoterapijskih razloga
- e) ukoliko to zahtjeva finansijski plan Zavoda

## IV PROPISIVANJE LIJEKOVA

## XII

### (Vrste recepata)

- (1) Lijekovi sa liste lijekova se propisuju osiguranom licu na obrascima recepata koje utvrđuje Zavod, i to:
  - a) žuti recept za sve kategorije osiguranih lica, osim,
  - b) crveni recept za osigurana lica sa statusom RVI,
  - c) zeleni recept za propisivanje inzulina za sve kategorije osiguranih lica
  - d) ponovljivi recept za osiguranike koji se trajno liječe od hroničnih bolesti
  - e) ampularni recept – nalog za sva osigurana lica,
- (2) Na jedan recept može se propisati samo jedan lijek
- (3) Recept iz stava 1. ove tačke vrijedi 15 dana od dana propisivanja lijeka, osim u slučaju propisivanja antibiotika kada recept vrijedi 3 dana od dana propisivanja, odnosno propisivanja lijeka koji sadrži opojne droge i psihotropne supstance, kada recept vrijedi 5 dana od dana propisivanja
- (4) Ampularni recept obavezno sadrži mjesto za potpis osigurane osobe kojim se potvrđuje aplikacija lijeka.
- (5) Zdravstvene ustanove primarne zdravstvene zaštite, snadbijevanje ampularnim lijekovima vršit će putem trebovanja preko ugovornih apoteka koje ovlasti Zavod.

## XIII

### (Šifra ljekara za recepte)

- (1) Listu ljekara ovlaštenih za propisivanje lijekova sa liste lijekova utvrđuje Zavod.
- (2) Ovlaštenim ljekarima iz stava (1) ove tačke Zavod dodjeljuje šifru u obliku bar koda.
- (3) Naljepnica sa bar kodom ovlaštenog ljekara obavezno se stavlja na obrazac recepta.

## XIV

### (Propisivanje količine lijeka i oznake na receptu)

- (1) Ovlaštenu doktor propisuje količinu lijeka koja je prema stanju pacijenta i prirodi bolesti dovoljna do ponovnog ljekarskog pregleda, i to:
  - a) kod akutnih oboljenja i stanja – u količini koja ne može biti veća od količine dovoljne do 10 dana upotrebe,

- b) kod hroničnih oboljenja i stanja, kada je u pitanju dugotrajna upotreba lijeka, u količini koja ne može biti veća od količine lijeka koja je dovoljna za 30 dana upotrebe, osim u slučaju ponovljivog recepta
  - c) u slučaju trajnog liječenja bolesnika sa hroničnom bolešću, ovlašteni ljekar primarne zdravstvene zaštite ima pravo osiguranoj osobi na ponovljivi recept propisati lijek za liječenje najviše do 90 dana, uz uslov da je zdravstveno stanje osigurane osobe prethodno bilo stabilno sa istom terapijskom dozom sa tim lijekom najmanje tri (3) mjeseca i ako prema procjeni ljekara propisivanje lijeka u toj količini i tom vremenskom periodu neće dovesti do ugrožavanja njegovog zdravlja.
  - d) u slučaju propisivanja lijeka na recept u hitnoj medicinskoj pomoći može se propisati lijek u količini potrebnoj za tri dana liječenja ili najmanje originalno pakovanje.
- (2) Nazivi gotovih lijekova ispisuju se bez skraćivanja
  - (3) Kad se propisuje gotov lijek koji se u prometu nalazi u raznim oblicima, pakovanjima i jačinama, ovlašteni doktor koji propisuje lijek na recept naznačuje oblik, jačinu, veličinu pakovanja i dozu lijeka.
  - (4) U slučajevima ispravke na receptu, ista mora biti ovjerena faksimilom i potpisom ovlaštenog doktora
  - (5) Uputstvo o načinu upotrebe lijeka mora biti na receptu potpuno.
  - (6) Nije dozvoljeno staviti samo riječi: «po potrebi,»po uputstvu» i sl.
  - (7) Ukoliko ovlašteni doktor propiše količinu lijeka koja je veća od jednog originalnog pakovanja, dužan je na receptu staviti oznaku "necesse est".
  - (8) Kada se zbog prirode bolesti osigurane osobe, lijek mora hitno izdati, ljekar koji je propisao lijek dužan je na receptu staviti jednu od oznaka: "cito", "statim" ili "periculum in mora".
  - (9) Prilikom propisivanja ponovljivog recepta, ovlašteni ljekar obavezno stavlja oznaku »repetatur« ili »ponoviti« ako želi da se propisani lijek na recept ponovno izda, uz obavezu naznake broja ponavljanja (brojem i riječima).
  - (10) Na ponovljivi recept se ne mogu propisati lijekovi za liječenje akutnih i hitnih stanja, ampularni lijekovi, opojne droge i psihotropne tvari, magistralni i galenski preparati koji se izrađuju u apotekama, te lijekovi koji nisu predviđeni za trajno liječenje hroničnih bolesti.
  - (11) U slučaju da u roku važenja propisane terapije na ponovljenom receptu, ovlašteni ljekar promijeni terapiju za osiguranika, dužan je obavijestiti ugovornu apoteku o promijeni terapije i potrebi zaključenja izdavanja lijeka po ponovljenom receptu.
  - (12) Lijekovi utvrđeni B listom lijekova mogu se osiguranoj osobi propisati na recept uz njezin pristanak, pri čemu osigurana osoba mora biti upoznata o svojoj obavezi participiranja u cijeni lijeka u iznosu utvrđenom u B listi lijekova. Doktor koji je osiguranoj osobi na njezin zahtjev propisao lijek sa B liste lijekova obavezan je u zdravstveni karton upisati i podatak da je lijek propisao uz saglasnost osiguranika ili eventualno na zahtjev osigurane osobe.
  - (13) Za ampularne lijekove, ovlašteni doktor je dužan da se pridržava utvrđenih indikacija i ograničenja, cijeneći naročito opravdanost uključivanja ampularnih lijekova u terapiju a da nije utvrđeno akutno i hitno stanje, bezbjednosti aplikacije terapije u kućnim uslovima, te jačim i ozbiljnijim nus pojavama i značajnim interakcijama lijekova, kao i dužini trajanja uključene terapije.

## V IZDAVANJE LIJEKOVA

### XV

#### (Izdavanje lijekova)

- (1) Lijekovi sa Liste lijekova koje propisuju ovlašteni ljekari izdaju se u ugovornim apotekama.
- (2) Lijek sa Liste lijekova prilikom isporuke ugovornoj apoteci ne može imati preostali rok upotrebe manji od 70% od njegovog cjelokupnog roka upotrebe.
- (3) Lijekove u ugovornim apotekama mogu izdavati samo lica koja za to ispunjavaju zakonom propisane uslove.
- (4) Magistar farmacije je dužan izdati na recept samo onaj lijek koji je ovlašteni ljekar naznačio na receptu, pod uslovom da je propisan u skladu sa odredbama Zakona o lijekovima i medicinskim sredstvima, Pravilnikom o načinu propisivanja i izdavanja lijekova i ovom Odlukom.
- (5) Ako pri propisivanju gotovog lijeka koji se u prometu nalazi u raznim oblicima, jačinama odnosno veličinama, ovlašteni doktor odnosno ovlašteni specijalist, ne naznači oblik, veličinu odnosno jačinu lijeka, magistar farmacije upozorava na to ovlaštenog doktora odnosno ovlaštenog specijalistu i pokušava se s njim sporazumjeti, ako je to moguće, i to prije izdavanja lijeka. Ako magistar farmacije nema mogućnosti da se sporazumije sa ovlaštenim doktorom odnosno ovlaštenim specijalistom, postupit će na jedan od slijedećih načina:
  - a) u pogledu oblika - izdaće najpogodniji oblik lijeka, s obzirom na uputstvo o njegovoj upotrebi;
  - b) u pogledu jačine - izdaće lijek najmanje jačine;
  - c) u pogledu veličine pakovanja izdaće najmanje pakovanje lijeka.
- (6) U svim slučajevima magistar farmacije će označiti na receptu oblik, jačinu i veličinu pakovanja izdatog lijeka.
- (7) Lijek propisan na ponovljeni recept osiguranoj osobi se izdaje u istoj apoteci, do uspostave e-recepta kada će se lijek moći izdavati u bilo kojoj ugovornoj apoteci.
- (8) Ako ovlašteni ljekar pored oznake »repetatur« ili »ponoviti« ne navede broj ponavljanja, izdavanje lijeka se može ponoviti još samo jedanput.
- (9) Ako ovlašteni ljekar koji propisuje lijek na ponovljivi recept uz oznaku »repetatur« ili »ponoviti« navede veći broj ponavljanja prema kojima bi se kod izdavanje lijeka izdala količina lijeka koja je veća od propisane, magistar farmacije je dužan umanjiti broj ponavljanja izdavanja lijeka do dozvoljene količine i evidentirati na receptu umanjenje kod prvog izdavanja lijeka.
- (10) Ako ovlašteni ljekar na ponovljivi recept propiše lijek za liječenje akutne bolesti, magistar farmacije može prvi puta izdati propisanu količinu lijeka, te zaključiti ponovljeno izdavanje lijeka što obavezno evidentira na receptu.
- (11) Pravo na ponovno izdavanje lijeka propisanog na ponovljivi recept može se ostvariti u pravilu najranije 3 dana prije isteka roka predviđenog za sljedeće podizanje lijeka.

### XVI

#### (Ugovorne apoteke)

- (1) Ugovorne apoteke su apoteke sa kojima Zavod ima zaključen ugovor o pružanju farmaceutske usluge za područje Kantona Sarajevo.
- (2) Ugovorne apoteke su obavezne na vidnom mjestu istaknuti oznaku – naljepnicu "Ugovorna apoteka".
- (3) Raskid ugovora će se izvršiti ako:

- a) komora magistru farmacije privremeno ili trajno oduzme odobrenje za samostalan rad,
- b) se ispune uslovi za prestanak rada apoteke,
- c) se utvrde propusti u radu sa receptima,
- d) apoteka nezakonito i nestručno nabavlja, skladišti i izdaje lijekove,
- e) se ne izvrši izvještavanje Zavoda, Ministarstva zdravstva i Zavoda za javno zdravstvo Kantona Sarajevo
- f) u svom radu napravi propuste vezano za zaštitu tajnosti medicinskih i drugih informacija,
- g) u radu ne osigura jednak tretman svim korisnicima usluga
- h) ne ispunjava uslove utvrđene Odlukom o mreži apoteka u Kantonu Sarajevo, kao i kriterijima, načinu i uslovima ugovaranja apoteka,
- i) ne obezbijede asortiman svih lijekova koji se propisuju i izdaju na teret sredstava obaveznog zdravstvenog osiguranja.

## XVII

### (Uslovi pod kojima se lijek ne smije izdati)

Ugovorna apoteka ne smije izdati lijek na teret sredstava obaveznog zdravstvenog osiguranja ukoliko:

- a) recept nije propisan od strane ovlaštenog ljekara,
- b) nedostaju podaci o osiguranom licu,
- c) nedostaje šifra i faksimil ljekara
- d) je od dana propisivanja antibiotika proteklo više od 3 dana,
- e) je od dana propisivanja lijeka koji sadrži opojne droge i psihotropne supstance proteklo više od 5 dana,
- f) je od dana propisivanja lijeka proteklo više od 15 dana.
- g) ako je na recept propisan lijek iznad dopuštene maksimalne doze, a ljekar koji je propisao lijek nije stavio potrebne oznake.

## XVIII

### (Način obračuna cijene lijeka)

- (1) Na iznos participacije koju plaća osigurano lice ne obračunava se maloprodajna marža ugovorne apoteke.
- (2) Osigurana lica sa statusom RVI su posebnim propisom oslobođena plaćanja učešća u cijeni lijekova i isto plaća Ministarstvo iz sredstava obezbijedenih kantonalnim budžetom za ovu namjenu.

## XIX

### (Zalihe lijekova)

- (1) Ugovorna apoteka je obavezna obezbijediti kontinuirano snabdijevanje osiguranih lica lijekovima sa liste lijekova i u tom cilju osigurati jednomjesečne zalihe istih.
- (2) Izuzetno od stava 1. ove tačke, ako ugovorna apoteka nema propisani lijek zbog njegove nestašice na tržištu Bosne i Hercegovine, magistar farmacije ima pravo izdati osiguranoj osobi lijek istog sastava sa Liste lijekova, a pod uslovom da se osigurana osoba složila sa zamjenom lijeka.
- (3) Nestašicu lijeka na tržištu BiH utvrđuje Zavod na osnovu obavijesti zaprimljenih od proizvođača lijekova i o tome obavijestava ugovorne ljekare i ugovorne apoteke.
- (4) Zamjenu lijeka magistar farmacije označava na receptu.



- (5) Sve zdravstvene ustanove primarne zdravstvene zaštite u kojima se primjenjuju ampularni lijekovi su dužne da osiguraju jednomjesečne zalihe ovih lijekova.

## VI PRELAZNE I ZAVRŠNE ODREDBE

### XX

#### **(Nadzor kod propisivanja i izdavanja lijekova)**

- (1) Kontrolu propisivanja i izdavanja lijekova sa liste lijekova provodit će farmaceutski i zdravstveni inspektori Kantonalne uprave za inspekcijske poslove i kontrolori Zavoda.
- (2) U slučaju da inspektori, odnosno kontrolori Zavoda, ustanove da se ovlašten i ljekar ne pridržava odredaba ove Odluke i drugih propisa koji regulišu pitanje propisivanja lijekova, oduzet će se ovlaštenje za propisivanje lijekova na teret sredstava obaveznog zdravstvenog osiguranja.
- (3) U slučaju da nadležni inspektor, prilikom nadzora, ustanovi da se izdavanje lijeka od strane magistra farmacije ne vrši na način i u skladu sa Zakonom, odnosno ovom Odlukom, predložit će Zavodu raskid ugovora sa ugovornom apotekom, odnosno izreći će mjeru u smislu čl. 106. i 107. Zakona o lijekovima ("Službene novine Federacije BiH", br. 51/01 i 29/05).

### XXI

#### **(Kontrola propisivanja i izdavanja lijekova)**

Zavod vrši kontrolu i prati propisivanje lijekova po ovlaštenim ljekarima i zdravstvenim ustanovama, prati i kontroliše izdavanje lijekova po ugovornim apotekama, prati i kontroliše potrošnju lijekova po osiguranim licima i ima pravo kontrole izvršavanja obaveza ugovornih apoteka, u cilju preduzimanja odgovarajućih mjera i radnji radi otklanjanja uočenih nepravilnosti.

### XXII

#### **(Mjesečni izvještaj)**

Zdravstvene ustanove primarne zdravstvene zaštite su dužne dostavljati Zavodu mjesečne izvještaje o potrošnji ampularnih lijekova.

### XXIII

#### **(Završne odredbe)**

Stupanjem na snagu ove Odluke prestaje da važi Odluka o listi lijekova koji se propisuju i izdaju na teret sredstava Zavoda zdravstvenog osiguranja Kantona Sarajevo, kao i načinu njihovog propisivanja i izdavanja ("Službene novine Kantona Sarajevo", br. 9/09, 26/09) i Odluka o ampularnoj listi lijekova koji se primjenjuju u zdravstvenim ustanovama primarne zdravstvene zaštite na teret sredstava Zavoda zdravstvenog osiguranja Kantona Sarajevo kao i načinu njihove primjene («Službene novine Kantona Sarajevo», broj 16/03«).

XXIV

Ova Odluka stupa na snagu osmog dana od dana objavljivanja u "Službenim novinama Kantona Sarajevo", a važit će do donošenja provedbenih propisa utvrđenih Zakonom o lijekovima i medicinskim sredstvima ("Službeni glasnik BiH", broj 58/08).

P R E M I J E R

Fikret Musić

Broj 02-05-14652-9/12  
26.04.2012.godine  
Sarajevo